

Morning Dogri (NSD) National News Bulletin 28-03-2025

आकाशवाणी

- लोकसभा नै कल इमिग्रेशन ते विदेशी बसनीकें सरबंधी बिल गी पास करी दित्ता। गृह मंत्री अमित शाह होरें आखेआ जे राश्ट्री सुरक्षा लेई खतरा पैदा करने आहलें गी भारत च दाखल नेई होन दित्ता जाहग।
- जम्मू-कश्मीर दे कठुआ जिले च होए दे टाक्करे दरान सुरक्षाबलें त्रै आतंकवादिएं गी मारी मुकाया ऐ। कार्रवाई दरान सुरक्षाबलें दे त्रै जवान बी शहीद होए न।
- इसरो नै अपने अंतरिक्ष डॉकिंग प्रयोग – स्पैडेक्स मिशन दे हिस्से दे तौरा पर रोलिंग प्रयोग गी कामयाबी कन्नै सबूरा करी लैता ऐ।
- महिलाएं ते बच्चें दे विकास सरबंधी मंत्रालय नै प्रधानमंत्री राश्ट्री बाल पुरस्कारें लेई आवेदन मंगे न।
- चिली दे राश्ट्रपति गैबरियल बोरिक फॉन्ट होर औंदी पैहली अप्रैल थमां भारत दी 5एं दिनें दी जात्तरा पर आवै करदे न।
- जार्डन च खेड्डी जा'रदी सीनियर एशियाई कुश्ती प्रतियोगिता च दे कल त्रीये ध्याड़े भारत नै चांदी दा इक ते कैह दे 2 तगमे अपने नांS कीते न।

<><><><><><>

HM Foreigners Bill

केंद्रीय गृह मंत्री अमित शाह होरें आखेआ ऐ जे राश्ट्री सुरक्षा लेई खतरा पैदा करने आहलें गी भारत च दाखल नेई होन दित्ता जाहग। लोकसभा च कल आव्रजन ते विदेशी नागरिकें सरबंधी बिल-2025 पर चर्चा दा परता दि'दे होई उ'नें आखेआ जे भारत च अशांति फैलाने लेई रोहिंग्या ते बांग्लादेशियें खलाफ सख्त कार्रवाई कीती जाहग। श्री शाह होरें आखेआ जे देश कोई धर्मशाला नेई ऐ जित्थे कोई बी अपनी मर्जी कन्नै आइयै रेई सकदा ऐ। गृह मंत्री होरें आखेआ जे देशै दी सुरक्षा लेई सरकार कश एह जानकारी होनी लाजमी ऐ जे देसै च कु'न, किन्ने चिरै लेई ते केहड़ी वजहें करी भारत आवा करदा ऐ। उ'नें आखेआ जे इस बिल च, देशै च दाखल होने आहले हर इक विदेशी पर तक्क रक्खने आस्तै इक व्यापक प्रणाली स्थापित करने दी बवस्था कीती गई ऐ। उ'नें इब्बी आखेआ जे एहदे'नै देशै दे विकास च सहायता मिलोग ते बपार लेई औने आहलें पर बी तक्क रक्खी जाई सकोग। गृह मंत्री होरें आखेआ जे एहदे'नै सरकार गी देसै दी सुरक्षा लेई खतरा पैदा करने आहलें पर बी नेड़मी तक्क रक्खने च मदाद मिलोग।

एहदे शा पैहले चर्चा दे शुरू च कांग्रेस पार्टी दे मनीष तिवारी होरें बिल दा बरोध करदे होई आखेआ जे एह संविधान दे खलाफ ऐ। उ'नें आखेआ जे इम्मीग्रेशन अधिकारियें गी ऐसे अधिकार दित्ते गे न, जि'दे कन्नै लोकें गी परेशान कीता जाई सकदा ऐ। श्री तिवारी होरें विधेयक च सुरक्षा प्रावधान आहने दी जरूरतै पर बल दित्ता। मगरा लोकसभा नै इस बिल गी पास करी दित्ता।

<><><><><><>

J&K Encounter

जम्मू कश्मीर च कठुआ जिले दे जुथाना दे सुफैन जंगली इलाकें च कल रातीं होए दे टाकरे च त्रऊं आतंकवादिएं गी मारी मकाया गेआ। इस दरान त्रऊं सुरक्षा बलें दे शहीद होने दी बी खबर ऐ। इक डीएसपी ते इक पैरा कमांडो सनें चऊं दुए सुरक्षाकर्मी बी घायल होई गे। टाकरा कल बडलै शुरू होआ, जिसलै सुरक्षाबलें सुफैन दे जंगली इलाकें च छप्पे दे आतंकवादिएं गी इक समूह गी फगड़ने लेई तलाशी अभियान चलाया हा। इस टाकरे दरान सुरक्षाबलें त्रऊं आतंकवादिएं गी मारी मकाया, उआं इंदियां लोथां अजें बरामद नेई होइयां। टाकरे आली थाहर कोला तकरीबन 30 किलोमीटर दूर ऐ, जित्थें 23 मार्च गी हीरानगर सेक्टर च अंतर्राष्ट्रीय बन्ने पर सन्याल ग्रां दे कोल पैहली बारी 5 आतंकिएं गी दिक्खेआ गेआ हा।

<><><><><><>

ISRO

भारती अंतरिक्ष अनुसंधान संगठन— इसरो नै अपने अंतरिक्ष डॉकिंग प्रयोग — स्पैडेक्स मिशन दे हिस्से दे तौरा पर रोलिंग प्रयोग गी कामयाबी कन्नै सबूरा करी लैता ऐ। संगठन दे अध्यक्ष वी.नारायणन होरें आखेआ ऐ जे इसरो गी बक्ख-बक्ख हालात च डॉकिंग दी लोड़ होग, जि'दे चा किश गी मजूदा मिशन दे हिस्से दे रूपै च आजमाया जाहग। "रोलिंग" जां "रोटेटिंग" प्रयोग च उपग्रहें चा कुसै इक्क दी परिक्रमा करना शामिल ऐ, तांजे उपग्रह दी रफ्तार पर काबू पाया जाई सकै। चंद्रयान-4 ज्नेह भविक्ख दे मिशनें लेई महत्वपूर्ण एह प्रयोग मुल्लवान डेटा प्रदान करग ते इसरो गी केई सॉफ्टवेयर ते ग्राउंड स्टेशन नियंत्रण करने च मदाद मिलोग। एहदे राहें पैहले 13 मार्च गी, इसरो नै स्पैडेक्स मिशन दे हिस्से दे तौर पर 2 उपग्रहें दी अनडॉकिंग कामयाबी कन्नै पूरी कीती ही। एह उपलब्धि भारत दी अंतरिक्ष दी खोज आहली जात्तरा च इक महत्वपूर्ण उपलब्धि साबत होई ही।

<><><><><><>

Bal Puskar

महिला ते बाल विकास मंत्रालय नै प्रधानमंत्री राश्ट्रीय बाल पुरस्कार लेई आवेदन मंगे न। आवेदक 11 अप्रैल थमां राश्ट्रीय पुरस्कार पोर्टल राएं आवेदन करी सकदे न। मंत्रालय नै इक ब्यान च आखेआ ऐ जे कोई बी बचा जेहड़ा भारत च रौहने आला भारतीय नागरिक ऐ ते जेहदी उमर 5 ब'रे ऐ ते 31 जुलाई 2025 तगर 19 ब'रे शा बद्ध उमरी दा नेई ऐ, ओह् इनें पुरस्कारें लेई आवेदन भरी सकदा ऐ। मंत्रालय बहादुरी, खेड्ड, समाज सेवा, विज्ञान ते संस्कृति दे क्षेत्र च उपलब्धियां हासल करने आले बच्चे गी सम्मानत करने लेई हर ब'रे प्रधानमंत्री राश्ट्रीय बाल पुरस्कार दा आयोजन करदा ऐ। ऑनलाइन आवेदन करने दी खीरी तरीक 31 जुलाई रखी गेदी ऐ।

<><><><><><>

Chilli President

चिली दे राश्ट्रपति गेबरीयल बोरिक फॉट हुंदी 1 अप्रैल थमां भारत दी 5एं दिनें दी यात्रा उप्पर औंगन। उंदे कन्नै इक उच्च स्तरीय प्रतिनिधिमंडल बी भारत औग, जेहदे च मंत्री, सांसद, वरिष्ठ अधिकारी, बपार संघ, मीडिया ते भारत चिली सांस्कृतिक सरबंधें कन्नै जुड़े दे प्रमुख चिलीवासी शामिल होंगन। राश्ट्रपति दे रूपै च एह बोरिक हुंदी पैहली भारत यात्रा होग। यात्रा दरान राश्ट्रपति बोरिक 4 अप्रैल गी प्रधानमंत्री नरेन्द्र मोदी हुंदे कन्नै गल्लबाट करगंन जेहदे च भारत-चिली सरबंधे दे सब्बने पैहलुएं उप्पर तफसीली चर्चा कीती जाग। प्रधानमंत्री होर परौहने दे सम्मान च दपैहरी दी रूट्टी दा आयोजन करगंन। राश्ट्रपति बोरिक होर राश्ट्रपति द्रौपदी मुर्मू हुंदे कन्नै बी मलाटी करगंन। राश्ट्रपति बोरिक 5 अप्रैल गी चिली परतोने शा पैहले आगरा, मुंबई ते बैंगलुरु दा दौरा बी लांगन।

<><><><><><>

PM-Japan

प्रधानमंत्री नरेन्द्र मोदी होरें कल नमीं दिल्ली च जापान दे इक उच्च स्तरीय प्रतिनिधिमंडल कन्नै मलाटी कीती। प्रतिनिधिमंडल कन्नै भारत-जापान बश्कार आर्थिक सैहयोग गी होर निगार करने बारे बचार ते सुझाह लैते गे।

चर्चा च दपक्खी बपार सरबंध मजबूत करने, निवेश दे मौके बधाने ते राई—बाई, समुंद्री उत्पाद, अंतरिक्ष—रक्षा, बीमा, प्रौद्योगिकी, बुनियादी ढांचे, स्वच्छ ते परमाणु, ऊर्जा जनेह प्रमुख क्षेत्रें च सैहयोग गी बढ़ावा देने उपपर चर्चा कीती गई।

<><><><><><>

PM-Belgium

प्रधानमंत्री नरेन्द्र मोदी होरें कल बैल्जियम दे राजा फिलिप हुंदे कन्नै फोन उपपर गल्लबाट कीती। सोशल मीडिया दी पोस्ट च मोदी होरें गलाया जे उनें मजबूत दपक्खी सरबंधें गी होर निगगर करने, बपार ते निवेश गी बढ़ावा देने ते नवाचार ते स्थिरता च सैहयोग गी अगगे बधाने उपपर चर्चा कीती। प्रधानमंत्री होरें हाल च गै राजकुमारी एस्ट्रिड हुंदे नेतृत्व च भारत च बैल्जियम दे आर्थिक मिशन दी बी सराहना कीती।

<><><><><><>

UP-DGP

उत्तर प्रदेश दे पुलस महानिदेशक प्रशांत कुमार होरें औंदी ईद—उल—फितर ध्यार दरान कनून बवस्था जकीनी बनाने लेई सुरक्षा सरबंधी दिशा निर्देश जारी कीते न। एह निर्देश पूरे राज्य दे सब्बने जोनल अतिरिक्त पुलस महानिदेशें, पुलस कमीशनरें, क्षेत्रीय महानिदेशकें, उप—महानिदेशकें, वरिष्ठ पुलस अधीक्षकें ते पुलस अधीक्षकें गी भेजे गे न। दिशा निर्देशें मूजब जोन ते सेक्टर योजना तैह्ते पुलस बवस्था कीती जानी लोड़चदी ऐ जेह्दे तैह्ते संवेदनशील इलाकें दी पंछान बी कीती जानी लोछचदी ऐ। अधिकारिण गी समाज विरोधी तत्वे दी सूचि गी अपडेट करने दे निर्देश बी दित्ते गेदे न। डीजीपी होरें सैहयोग हासल करने लेई शांति समिति दे सदस्यें ते धार्मिक नेताण कन्नै बैठकां करने उपपर जोर दित्ता ऐ।

<><><><><><>

Cold Chain

भारत आसेआ होरनें मुख्यें गी कोल्ड चेन ते दवाइण दे प्रबंधन सरबंधी खेत्तर च सिखलाई दित्ती जा'रदी ऐ। सेह्ते ते परोआर कल्याण सरबंधी राश्ट्री संस्थान नै पैहले गै नेपाल ते मलावी गी सिखलाई उपलब्ध करोआई दित्ती दी ऐ। एह इदारा, हर चाल्ली दे कोल्ड चेन ते दवाइण दे प्रबंधन आह्ली पैहलकदमिण गितै राश्ट्री ते अंतर्राश्ट्री सतहें उपपर तकनीकी मदाद उपलब्ध करोआंदा ऐ।

आकाशवाणी खबरें कन्नै गल्ल करदे होई संस्थान दे डरैक्टर धीरज शाह होरें आखेआ ऐ जे उं'दा इदारा, तकनीकी माहिरें ते वर्करें गी, उपकरणें वगैरा गी चलाने ते उं'दी सांभ-संभाल मतल्लक सिखलाई बी दिं'दा ऐ। एहदे अलावा उं'दे आसेआ खास तौर उप्पर डाक्टरें गी सिखलाई देने आह्ला इक नमां कार्यक्रम बी रम्भने दी योजना बनाई जा'रदी ऐ तांजे डाक्टर, मते बेह्तर ढंगै'नै अपने मरीजें ते उं'दे परोआरें कन्नै राबता बनाई सकन।

<><><><><><>

Wrestling

भारत नै जार्डन दे अमान च सीनियर एशियाई कुश्ती चैंपियनशिप दे त्रीए ध्याड़े कल इक चांदी ते दो कैह दे तगमे जित्ते। महिला पैहलवानें शानदार प्रदर्शन कीता। रीतिका नै चांदी दा तगमा ते मुस्कान ते मानसी नै इक-इक कैह दा तगमा जित्तेआ। रीतिका नै 76 किलोग्राम वर्ग च खेड्डदे होई भारत गी पैह्ला चांदी दा तगमा हासल करोआया।

<><><><><><>